

## GDJE SU OMER I ALIJA, R.A.?

(Džuma br. 600)

Neka je hvala Allahu, dž.š., Gospodaru svih svjetova, Koji me je počastio da danas predvodim svoju 600. džumu u ovom Džematu. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji u pogledu dunjalučkih stvari gledaju u one koji su ispod njih, a u pogledu imana u one koji su iznad njih.

Braćo moja u Dini Islamu! Jedan od najljepših događaja u povijesti Islama, sa jednom od najljepših poruka, vezan je za halifu Omera ibn el-Hattaba, r.a., i Aliju ibn Ebi Taliba, r.a. Naime, oni su 23. godine po Hidžri među hadžijama u Mekki tražili jednog čovjeka iz Jemena. Pa kad su ugledali skupinu iz Jemena Omer se pope na vrh jednog brežuljka i odozgo povika: "O hadžije iz Jemena, ima li među vama čovjek po imenu Uvejs?"

Jedan starac sa dugom bradom, porijeklom iz Karena, podiže se i reče: "Vođo pravovjernih, među nama ima samo jedan čovjek sa tim imenom. To je moj bratić. Ali zašto pitaš za njega? On je bezvrijedan, nepoznat i najsiromašniji među nama." Omer kratko zašuti a onda upita: "Reci mi, starče, gdje je tvoj bratić? Je li s nama u Mekki?" "Da, vođo pravovjernih", odgovori starac, "ali on čuva naše kamile u blizini Arefata."

Omer i Alija uzjahaše na svoje magarce te se uputiše prema Arefatu. Našli su ga kako klanja pod jednim stablom, u pohabanoj vunenoj odjeći, a deve su bile oko njega. Omer tada reče Aliji: "Oče Hasanov, ako na Dunjaluku postoji Uvejs el-Kareni, onda je to ovaj čovjek." Sjahali su i požurili da se susretnu s njim, a on, osjetivši njihovo prisustvo, požuri da završi namaz. Kad su mu prišli nazvali su selam, a zatim ga Omer upita: "Ko si ti?", a on odgovori: "Ja sam čoban i narodni najamnik." "Ne pitam te to", reče Omer, "već kako se zoveš?" On reče: "Ja sam Allahov rob i sin svog naroda." Oni rekoše: "Svi su na nebesima i Zemlji Allahovi robovi. Već, tako ti Allaha, reci nam ime koje ti je dala tvoja majka." On upita: "A šta vas dvojica želite od mene? Ja sam Uvejs ibn Abdullah." Omer uzviknu: "Allahu ekber! Pokaži nam mjesto ispod tvog lijevog ramena." Uvejs upita: "A što vam to treba?" Na to Alija reče: "Poslanik, s.a.v.s., nam te je opisao, pa smo primijetili ta svojstva kod tebe, i on nas je obavijestio da se pod tvojim lijevim ramenom nalazi sjajni bijeli biljeg veličine dirhema ili dinara, pa želimo da ga vidimo." Uvejs im tada pokaza dio ispod svog lijevog ramena.

Kada su Alija i Omer ugledali sjajni bijeli biljeg, požurili su ko će prvi da ga poljubi a zatim rekoše: "Uvejse, naš Poslanik, s.a.v.s., nam je naredio da ti prenesemo njegov selam i da te zamolimo da za nas zatražiš oprost, pa učini to, Allah ti se smilovao. I rekao je da ćeš ti biti prvak tabi'ina te da ćeš se zauzimati za mnoge na Sudnjem danu."

Uvejs žestoko zaplaka a zatim reče: "Nadam se da je to neko drugi, a ne ja." Alija reče: "Mi smo sigurni da si ti taj, pa moli Allaha za nas dovom dobročinitelja." Uvejs reče: "Ja ne upućujem specijalno dove ni za sebe a ni za bilo koga od sinova Ademovih, već za sve vjernike i vjernice, muslimane i muslimanke, i na kopnu i na moru, i u tmuni noći i na svjetlu dana. Nego, ko ste vas dvojica, Allah vam se smilovao? Ja sam vas obavijestio o sebi, ali ne želim da iko od ljudi to sazna." Alija reče: "Ovo je vođa pravovjernih, Omer ibn el-Hattab, a ja sam Alija ibn Ebi Talib."

Uvejs od radosti skoči na noge, zagrli ih i poljubi te reče: "Neka vas Allah nagradi u ime ummeta." "I tebe neka Allah nagradi.", rekoše. A Uvejs zatim reče: "Zar ja ovakav da tražim oprost za vas?!" "Da", rekoše, "nama je to potrebno od tebe, pa uputi dovu specijalno za nas." Uvejs podiže glavu i zamoli: "Moj Allahu, ova dvojica kažu da me vole u Tvoje ime i traže da Te molim za njih, pa im oprosti grijehe i učini ih od onih za koje će se zauzimati njihov Poslanik Muhammed, s.a.v.s." Omer reče: "Ostani tu dok odem u Mekku i donesem ti nešto od svoje hrane i odjeće. Vidim da ti je odjeća stara i pohabana. Sutra ćemo se, ako Bog da, naći na istom mjestu."

A Uvejs reče: "Vođo pravovjernih, sastanka između mene i tebe više neće biti, a niti se od danas ti i ja poznajemo. Zar misliš da bih ja ovaj svoj ogrtač i odjeću od vune zamijenio za nešto drugo? Šta ti misliš, kad ću ja poderati ove zakrpljene sandale, i kada ću potrošiti ova četiri dirhema, koja sam zaradio čuvajući deve? Vođo pravovjernih, dunjalučko izobilje je obmana – kratkotrajno je i prolazno. Ko osvane opterećen dnevnim brigama, razmišljat će o sutrašnjem danu, a ko je opterećen brigama za sutrašnji dan, srce će mu biti vezano za cijelu sedmicu, a čije srce bude opterećeno zbivanjima sedmicu unaprijed, neće se odreći ni mjeseca, pa će onda čeznuti i za godinom, a kraj mu je bliži od njegovih nada i ispunjenja planova. Ko se sustegne od dunjalučkog izobilja, sutra će naći što želi kod Svemogućeg, u džennetskim perivojima punim svakojakih plodova i svega što se poželjeti može i što um pojmiti ne može."

Čuvši to, Omer udari svojim bičem o zemlju i povika: "Kamo sreće da Omera majka nije ni rodila i da nerotkinja nije izliječena." Uvejs reče: "Vođo pravovjernih, hajte vi svojim putem, a ja ću svojim." Tako Uvejs ode goneći kamile pred sobom, a Omer i Alija ostadoše da gledaju za njim dok se nije izgubio iz vida. A zatim se vratiše u Mekku.

Braćo moja! Gdje su Omer i Alija, r.a., a gdje smo mi? I gdje je Uvejs El-Kareni?

Nastavit ćemo, akobogda.

Molim Dragog Allaha da nas uputi na ona djela kojima ćemo steći Njegovu blizinu, ljubav i zadovoljstvo. Amin ja Rabbe'l alemin.